

Псалом 102

Автор: Павел
22.03.2012 13:36

Благослові, душе моя, Господа, и вся внутреня моя имя святое Его.
Благослові, душе моя, Господа, и не забывай всех воздаянии Его.
Очищающего вся беззакония твоя, исцеляющего вся недуги твоя.
Избавляющего от истления живот твой, венчающего тя милостию и щедротами. Исполняющего во благих желание твое, обновится яко орлу юность твоя. Твори милостыню Господь, и судьбу всем обидимым. Сказа пути Своя Моисеови, сыновом израилевим хотения Своя. Щедр и милостив Господь, долготерпелив, и многомилостив. Не до конца прогневается, ни в век враждует. Не по беззаконием нашим сотворил есть нам, ни по грехом нашим воздал есть нам. Яко по высоте небесней от земли, утвердил есть Господь милость Свою на боящихся Его. Елико отстоят востоци от запад, удалил есть от нас беззакония наша. Яко же щедрит отец сыны, ущедрит Господь боящихся Его. Яко Той позна создание наше, помяну яко персть есмь. Человек, яко трава, дние его, яко цвет сельнии, тако оцветет. Яко дух пройдет в нем, и не будет, и не познает к тому места своего. Милость же Господня от века и до века, на боящихся Его. И правда Его на сынех сынов, хранящих завет Его, и помнящих заповеди Его творити я. Господь на небеси уготова престол Свой, и царство Его всеми обладает. Благословите Господа вси ангели Его, сильнии крепостию творящии слово Его, услышати глас словес Его. Благословите Господа вся силы Его, слуги Его, творящии волю Его. Благословите Господа вся дела Его, на всяком месте владычества Его, благослові, душе моя, Господа.